



ज्वलपा वाऱ्वा

JWOJALAPA WEEKLY

दैं ७ ल्या: १२ (पूर्णडक ११४) ने. सं. ११३६ कौलागा अस्तमि आइतवा: २०७३ कार्तिक ७ गते आइतवा: (Oct- 23, 2016)

मू द १- पृष्ठ द

न्हूदँया लसताय् थीथी ज्याभ्वः यायेगु किपू नगर दुने ब्यापक तयारी न्हूदँ अधिकारमुखि आन्दोलन खः कि सांस्कृतिक जात्रा ?

स्वंगू दशकया दुने नेवाः समाजय् विकास जूगु न्हूगु कथंया संस्कृति

ज्वलपा वा:पौ /

स्वनिगाःया आदिवासी नेवाःतय्सं स्वनिगाःया थीथी लागाय् थःथःगु हे कथं नेपाल संवत् ११३७ न्हूदँया लसताय् ज्याभ्वः यायेगु तयारी यानाच्चंगु दु । अथे हे किपू नगर दुने नं न्हूदँया लसताय् भिंतुना जुलुस पिकायेगुनिसं साहित्यिक ज्याभ्वः तर्क यायेगु तयारी यानाच्चंगु दु । थीथी खलः पुचःतपाखें तर्क न्हूदँया लसताय् भिंतुना कालबिल ज्याभ्वः यायेगु तयारी यानाच्चंगु दु । नेवाःत दक्ले अप्ठः नेवाः नुगः ज्वना सक्रिय जुइगु ई धइगु हे न्हूदँ जःखः खः । अले थ्व हे इलय् नेवाःतय्सं दक्ले अप्ठः गतिविधि याइगु खँय सुयां निगू मत दइमखु । उकिं किपू नगर दुने नं न्हूदँया लसताय् थीथी ज्याभ्वः यायेगु नितिं ब्यापक तयारी यानाच्चंगु दु ।

नेपाः देय्या नामं शंखधर साख्वाः संचालन यानावंगु नेपाःया मौलिक संवत् नेपाल संवत् खः । नेपाल संवत्यात राष्ट्रिय सम्बतया रुपय् राज्य नाला कायेमाः धकाः स्वनिगाःया आदिवासी नेवाःतय्सं अधिकारमुखि आन्दोलनया रुपय् सुरु याःगु करिव स्वंगू दशक थ्यने धुंकूगु दु । नेपाल संवत् ११ सय निसं नेवाःतय्सं नेपाल संवत्या आन्दोलन सांस्कृतिक आन्दोलनया रुपय् सुरु याःगु खः । नेपाल संवत्यात राष्ट्रिय सम्बत धकाः घोषणा याना राज्य हे प्रयोग यायेमाःगु राष्ट्रियताया भावना पिब्वया नेवाःतय्सं आन्दोलन सुरु याःगु खः ।

नेपाल संवत्या आन्दोलनया भवलय् पंचायतकालय् पञ्चायतया विरुद्ध स्वतन्त्रता, समानताया नारा थ्वयेकेगु नापं थःपिनिगु हक अधिकारया नितिं न्ह्याः वनेगु छगू त्वाथःया रुपय् नाला वयाच्चंगु खः । अन्ततः नेपाल संवत्या आन्दोलन धइगु सांस्कृतिक आन्दोलन जूगुलिं नेवाःतय्सं थःपिनिगु भाषिक, सांस्कृतिक व समानताया हक अधिकार सः थ्वयेकेगुया रुपय् अले नेपालभाषाया साहित्यिक ज्याभ्वःयात न्ह्यःने यंकेगु आन्दोलनया रुपय् न्ह्याकूगु खः । लगातर रुप न्ह्याकूगु न्हूदँ आन्दोलन ब्यापकता कया वनेवं राज्य पक्ष नेपाल सम्बतया आन्दोलनयात सम्बोधन यायेत बाध्य जूगु खः । उकिं तत्कालिन प्रधानमन्त्री कृष्णप्रसाद भट्टराईया इलय् नेपाल संवत्या प्रवर्तक शंखधर साख्वाःयात राष्ट्रिय विभूतिया रुपय् घोषणा याःगु खःसा



प्रधानमन्त्री पुष्पकमल दाहाल प्रचण्डया इलय् नेपाल संवत्यात राष्ट्रिय सम्बतया रुपय् घोषणा याःगु खः । थुगु कथं नेपाल संवत्या आन्दोलन छगू कथं पुरा जूगु जूसां नं उकियात व्यवहारय् प्रयोग याके मफयाच्चंगु नापं राज्य नं नांया जक नेपाल संवत्यात राष्ट्रिय सम्बत धकाः घोषणा यायेगु ज्या जूगु थें महसूस यायेत बाध्य जूगु दु । छखे राज्यपाखें नेपाल संवत्यात राष्ट्रिय सम्बतया रुपय् घोषणा याःगु अले मेखे नेवाःतय्सं नं नेपाल संवत्या न्हूदँ आन्दोलनयात लिपांगु इलय् वया सांस्कृतिक ज्याभ्वःया रुपय् हिलायंकूगु खने दु ।

शंखधर साख्वाःया भ्वातायात कुविया चाःहिलेगु, सांस्कृतिक बाजा गाजा सहित छगू कथं जात्रा हे यायेगु अले मेमेगु नखः हनेगु थें हे न्हूदँ भिंतुना याली यायेगु ज्या नेवाःतय्सं याना हयाच्चंगु दु । नेपाल संवत्या आन्दोलनयात किपू पांगा लागायत फुक धाइथें नेवाः वस्तीइ हे सांस्कृतिक नखः हनेथें यानाहःगु दु । मानौ कि स्वंगू दशकया दुने नेवाः समाजय् छगू न्हूगु संस्कृति विकास जूगु थें महसूस यायेत बाध्य जूगु दु । आः नेपाल संवत्या आन्दोलनयात सुना नं नेवाःतयगु संस्कृति मखु धकाः धायेफइगु अवस्था मदु । नेवाः समाजय् लिपांगु इलय विकास जूगु छगू न्हूगु संस्कृति जुया विउगु दु नेपाल संवत्या न्हूदँ भिंतुना याली । भिंतुना याली म्हपुजा खुन्हु नेपाल संवत् हिलीगु दिनय् याना वयाच्चंगु दुसा आः थुगु संस्कृतियात सुना नं पना पने फइगु अवस्था मदु । त्वाः त्वालय् च्वंगु खलः पुचःतय्सनिसं दाफा खलःतपाखें हे पाः कया हये धुंकूगु अवस्थाय् थ्व छगू कथंया संस्कृति जुया विउगु हे दु । आः वया न्हू पुस्त्यापिं नेवाःत वा मेगु छु नं समुदायया मनूतय्त न्यन धाःसा न्हूदँ याली धइगु

नेवाःतयगु छगू संस्कृति खः धकाः अःपुक हे धाइ । सांस्कृतिक बाजं थाना अले संस्कृतिया रुपय् हनाच्चंगुलिं न्हूदँया यालीयात संस्कृति धकाः धाइगु नं स्वाभाविक हे खः । भाषिक, सांस्कृतिकनिसं थीथी ख्याःया समानता, राष्ट्रियताया नितिं आन्दोलनया रुपय् न्ह्याःगु न्हूदँया भिंतुना याली आः वया संस्कृतिया रुपय् विकास जूगुलिं नेवाः समाजय् गुलि नं संस्कृतित दु व फुक धाइथें थुगु हे कथं विकास जूगु खयेमाः धकाः अःपुक हे अनुमान यायेफइगु अवस्था दु । नेवाः समाजय् गुगु कथं संस्कृतित विकास जुया वनाच्चंगु दु धइगु छगू जीवन्त उदाहरण धइगु हे न्हूदँ सांस्कृतिक याली खः धकाः धायेफइगु अवस्था दु ।

थौया इलय् नेपाल संवत्यात राष्ट्रिय सम्बत धकाः राज्य घोषणा याये धुंकूगु अवस्थाय् नेपाल संवत्यात व्यवहारय् छयलेगुनिसं न्हूदँ हनेगु भाला राज्यया नं खः धकाः सः थ्वयेकेमाः कि म्वाः धकाः छगू कथं बौद्धिक ख्यालय् बहस यायेमाःगु अवस्था वःगु दु । ई कथं हिला वनेत न्हूगु कथं बिचाः याना वनेगु सवालय् बहस यायेमाःगु अवस्था दु ।

न्हूदँया भवलय् पाःब्व लःल्हाइगु त्वाःदेवाः गायब !

स्वराज महर्जन

किपुलिं नेपाल संवत्या न्हूदँया भिंतुना जुलुस पिकाइगु इलय् पाःब्व कथं लःल्हाना वयाच्चंगु त्वाःदेवा गायब जूगु दु । करिव भिंस्वदँया दुने उगु त्वाःदेवाः गायब जूगु खः । नेपाल संवत् ११२३ सं किपूया कुतिसाः त्वाःलं न्हूदँया लसताय् यायेगु ज्याभ्वःया बारे सहलह ब्याकाः नेपाल संवत्या प्रवर्तक शंखधर साख्वाःया भ्वाता तयेगु ज्या याःगु खः ।

अवलेनिसं हे किपूया परम्परागत त्वाःयात न्हूदँया लसताय् भिंतुना जुलुस पिकायेगु पाःपाः विइगु ज्या याःगु खः । न्हापा थीथी खलः पुचः वा संघ संस्थातपाखें न्हूदँया लसताय् भिंतुना जुलुस पिकायेगु ज्या याना वयाच्चंगु खःसा नेपाल संवत् ११२३ निसं धाःसा विशेष याना सांस्कृतिक ज्याभ्वःया रुपय् हिलावंगु खने दु । त्वाः त्वालय् न्हूदँया भिंतुना यालीइ सहभागी जुइपिन्त लसकस यायेगु कथं लँय लँय बँ थिला हयेगु ज्या तर्क यात । उकिं याना भन न्हूदँया भिंतुना याली जात्राया रुपय् हिला वंगु महसूस यानाहःगु दु ।

त्वाः त्वाःयात पाःपाः विइवं अथे न्हूदँया ज्याभ्वः अधिकारमुखि वा जागरणमुखिसिबें नं छगू कथं न्हूगु जात्राया रुपय् हिला वंगु खः । अथे त्वाःत्वाःयात पाःपाः विइ न्ह्यः हे न्हूदँया भिंतुना जुलुसया पाः कायेगु नितिं धकाः थीथी खलः पुचःत जाना छगू त्वाःदेवाः तयातःगु खः । अले पाः काइगु खलः पुचः वा संघ संस्थायात उगु हे त्वाःदेवा लःल्हायेगु याना वयाच्चंगु खः ।

११२३ सं कुतिसाः त्वाःया पार्लनिसं शंखधर साख्वाःया भ्वाता तया कुविया यंकेगु ज्या जुल । अवलेनिसं शंखधरया भ्वाता नापं त्वाःदेवाः नं पाःलाःगु त्वाःयात लःल्हायेगु याःगु खः ।

उगु कथंया भिंतुना याली पिकायेगु पाः छसिंकथं कुतिसालं समल, बःधाखा, गःछें, थांबहाः, इताछें/हवाकुचा, तःननि, तुंभ्वः, म्वातत्वाः, चाफः, कुतुभ्वः, बाहिगां, नगां जुया सागाःयात पाः वःगु खः । सागाः तर्कया पाः थ्यंगु अवस्थाय् मनूतय्सं चायेकल कि न्हूदँया भिंतुना पाः कायेगु इलय् न्हापा दुगु त्वाःदेवाः आः मन्त धकाः । छगू कथं करिव भिंनिदँया दुने शंखधरया भ्वाता दत तर त्वाःदेवा गायब जुल । त्वाःदेवाः गायब जूगु विषययात कया न्हूदँ हनीगु नाप स्वापू दुपिं थीथी व्यक्तित्वपिं नापं नेवाः ख्यःयात कया चासो तइपिन्सं चर्चा यायेगु ज्या यानाहःगु दु । त्वाः देवाः गुगु कथं गायब जुल धइगु विषय खोजनीतिया विषय जुया विउगु दु ।

थ्व हे दथइ नेपाल संवत्या प्रवर्तक शंखधर साख्वाःया भ्वाता निर्माण यायेगु भवलय् किपू नगरपालिकायात संरक्षकया रुपय् तःगु अले शंखधरया भ्वाता तर्क पाः लाइगु पुचलं लःल्हाना कया किपू नगरपालिकाया ज्याकुथिइ यंका तयेगु ज्या निरन्तर रुप न्ह्यानाच्चंगु खः । अथे शंखधरया भ्वातायात नगरपालिकाया ज्याकुथिइ यंकाः तयेगु अले न्हूदँया नितिं कया हयेगु भवलय् हे त्वाः देवाः नगर पालिकाय् लाःगु खयेमाः धकाः मनूतय्सं अनुमान यानाहःगु दु ।





ज्वजलपा वा:पौ

सल्लाहकार

श्रीकृष्ण महर्जन

प्रकाशक:

नजरराम महर्जन

सम्पादक

श्रीकृष्ण तण्डुकार

ले-आउट:

ज्वजलपा डेस्कटप

संवाददाता

भरत महर्जन, निरजमान सिंह

थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweekly@gmail.com

सम्पादकिय

नेपाल संवतयात राज्यं हनेमा:

स्वंगू दशक न्ह्य:निसें स्वनिग:या आदिवासी नेवा:तय्सं अभियानया रुपय न्ह्याकूगु नेपाल संवतया न्हूदँयात आ: तक नं नेवा:तय्सं हे न्ह्याकाचंगु दु । नेवा:तयगु अधिकारमुखि आन्दोलनया रुपय सुरु जूगु न्हूदँया भिंतुना जुलुसयात राज्यं सम्बोधन यायेगु भ्त्वलय नेपाल सम्बतया प्रवर्तक शंखधर साखा:यात राष्ट्रिय विभूति घोषणा याये धुकूगु दुसा अथे हे नेपाल सम्बतयात नेपा:या राष्ट्रिय सम्बतया रुपय घोषणा याये धुकूगु दु । नेपा:या थ्व ई तकया दुने स्वयेगु ख:सा छगू जक राष्ट्रिय सम्बत नेपाल सम्बत हे ख: ।

विक्रम संवत, इश्वी सम्बत वा मेमेगु छुं नं सम्बतयात नेपाल राष्ट्रिय सम्बतया रुपय घोषणा याये धुकूगु अवस्था मदु । राज्यं हे नेपाल सम्बतयात नेपा:या राष्ट्रिय सम्बत धका: घोषणा याये धुकूगु अवस्थाय आ: तक नं नेपाल सम्बतया न्हूदँयात राज्यं हनाचंगु अवस्था मदुनि । राज्यपाखें थीथी कथंया दिवस हनेगु भ्त्वलय समारोह समिति हे दयेका राज्यं हे ध्यवा खर्च याना वयाचंगु दु । अले प्रधानमन्त्री, मन्त्रीतनिसें राज्यया संवैधानिक अंगया प्रमुखतनिसें कर्मचारीत तकं दिवसय परिचालन याइगु ख: ।

नेपा:या राष्ट्रिय सम्बत नेपाल सम्बतया न्हूदँया लसताय आ: तक नं नेवा:तय्सं याइगु थीथी कथंया गतिविधिइ सरकाया प्रतिनिधि वा प्रधानमन्त्री सहभागी जुइगु बाहेक मेगु यानाचंगु मदु । उकिं आ:या इलय नेवा:तय्सं नेपाल सम्बतया न्हूदँ नेपाल सरकार अर्थात राज्यपाखें हे हनेमा: अले उकिइ नेवा:तयगु नेतृत्वदायी भूमिका दयेमा: धका: माग यायेमा:गु ई व:गु दु । अले नेपाल सम्बतयात राष्ट्रिय सम्बतया रुपय घोषणा याये धुंका: उकियात व्यवहारय गुगु कथं लागू यायेगु धइगु खँ नेवा:तयगु मखु राज्यया खँ ख: धका: धाये सयेकेमा:गु ई व:गु दु ।

स्व:निगलं नेवा:त विस्थापित यायेगु चाल



नजरराम महर्जन

थगुने २०७२ वैशाख १२ गते व २९ गतेया त:भुखाचं देय्या भिंयंगु जिल्लाय तच्चकं लिचव: लाकल । गुदु: मनूया ज्यान काल, लखौं लख छैय थुनाविल । च्वने मजिक चिरिवायका बिल । नेवा:तयगु आदिभूमि स्वनिग:लय नं यक्व हे नोक्सान यानाबिल । उकि मध्ये काठमाडौं जिल्ला कीर्तिपुर नगर पालिका वडा नं.९, १०, ११ व १२ वडा पाँगाय नं भुखाचं त:धंगु नोक्सान यानाबिल । सलंस: खा: छै थुनाविल । पाँगाय जक भिंयमह मनूया ज्यान वन । त्वा: त्वा: हे सखाप जुल ।

सनिवा: न्हिनयया इलय भुखाय ब्व:गुलिं यक्व मनूत छैनं पिने वनाचंगु इलय ला:गुलिं अप्व: धनजनया क्षति मजुल । भुखाचं पिडितपिन्त ग्वाहालि यायेत पाँगाया प्यंगू वडाय नं वडास्तरी विपद व्यवस्थापन समिति नीस्वना विपदय ला:पिन्त नयेगु त्वनेगु जनस्तरं व्यवस्था यात । सरकार गन दु धका: मनूतसैं मस्यू । थीथी एन.जि.ओ, आइ.एन.जि.ओ व विदेशय वनांच्चपिं पाँगामितसैं ग्वाहालि यात । छवा: लिपातिनि जाकि छव्वरा, निब्वरा व त्रिपाल भतिचा ज्वना: सरकार खने दयेक: वल । लच्छि निला लिपा अस्थायी ठहरा दयेकेत धका: सरकारं भिंन्याद्र: धेवा बिइगु यात । उगु इलय निखा छै दुपिं, गनं मेथाय च्वनेगु दुपिन्त बिइमखु । लिपा सरकारं निगू लख दाँ बिइबलय भिं न्याद्र: कतय याना बिइगु । आ: धेवा मका:पिन्त लिपा छकलं निगु लख बिइगु धाल । कासा धका: निखा छैदुपिं व एन.जि.ओ.या ग्वाहालि कया: ठहरा दयेकाच्वपिन्सं धेवा मकाल अथवा धेवा मबिल । अनं लिपा चिकुलां लुमुगु लासा न्यायेत धका: भिद्व: दां बिल । उगु इलय भिंन्याद्र: धेवा मका:पिन्त भिद्व: बिइमखु धका:

मबिल । अलेतिनि मनूतय भतिचा मिखा प्वा: चाल । किपू नगरपालिकाया वडा नं.११ वडा कार्यालय तालाबन्दी याना जनता संघर्षय कुहाँवल । सकसित नं समान रुपं धेवा बिइमा: धका: नगर पालिकां सरकारयात पौ च्वल । अनतिनि ता:चा चाल । अयसां थौं तक छुं कथंया ग्वाहालि मदुनि ।

आ: सरकारं छै दनेत धेवा ग्वाहालि याइगु जुल । मेमेगु जिल्लाय धेवा: इना: बियाचंगु दु । स्वनिगलय प्राविधिकतसैं प्राविधिक जाँच याना: प्रतिवेदन बिइयंकल । आ: स्वनिगलय नं धेवा: इनीगु जुइयंगु दु । सरकारया ग्वाहालि कया: थ:गु भुखाचं थुंगु छै दने धका: आशा कयाच्वपिं पिडितपिं नकतिनि सर कारं जारी या:गु नियमं हिस्स जुल । उगु सूचं थुकथं दु ।

१.जिगु छै २०७२ साल वैशाख १२ गते व वयां लिपा ब्व:गु लिभुखाचं दुंगु ख: । २. जिगु मेथाय गनं च्वनेगु छै मदु । जिगु छै दुंगु पुनर्निर्माण यायेत अनुदान माग यानागु ख: । ३.जिं थ्व छै दनेत मेथाय गनं नं छुं कथंया ग्वाहालि कयागु मदु । ४. जि व जिगु छैज:या नितिं छै दनेगु जग्गा दु । ५. जिं दनेगु छै जिगु नीजि आवास अनुदान वितरण कार्यविधि व थुगु सम्भौता पत्रय न्ह्यथनात:गु शर्त, मापदण्ड, प्रविधि व गुणस्तर अनुरूप दयेके । ६.निर्माण सामाग्री न्यायेगु व दक:मि, सिक:मि प्लम्बर, इलेक्ट्रिसियन व मेगु निर्माण सामाग्री व ज्यायाईपिं व्यवस्था यायेगु जिगु जिम्मेवारी जुइ । ७. जित बिइगु आवास पुनर्निर्माण अनुदान रकम छै दनेगुली हे खचं याये । ८.जिगु छै दनेत बिइगु अनुदान बाहेक मेगु लागत जिं थप लगानी याना वा सहूलियत कर्जा वा भुकम्प पिडित विशेष आवास कर्जा छै दने । ९. पुनर्निर्माण ज्याभव: कथं बिइगु अभिमुखीकरण व तालिम ज्याभवलय जिं ब्वति काये । १०. जिगु छै तोकय या:गु गुणस्तर, मापदण्ड व प्रविधि अनुसार मजूसा जिगु श्रोत, साधन व सामाग्री छयला सुधार यायेत मन्जूर दु । ११. च्वय बियागु व्यहोरा ठीक जू । मखुगु ठहरे जूसा कानून बमोजिम सहयायेत जि तयार दु ।

थ्व सम्भौता पत्रया नमूना जुल । थ्व सम्भौता यायेत लाभग्राही घरधनीं स्वयन्त्यथनात:कथं भ्वैत हयेमा: धया: त:गु दु ।

क) नागरिकताया प्रमाणपत्र (ख) जग्गाधनी दर्ता प्रमाणपत्र (लालपुर्जा) व (ग) सर्वेक्षणया इलय बिउगु सर्वेक्षण या:बलय या:गु निस्सा समेत ।

आ: सवाल वई । पाँगाया जक मखु, किपूया गधपखा: दुनेया यक्व छैथुवातयके लालपुर्जा हे मदुनि । गधपखा: दुने नापी हे मजूनिसा लालपुर्जा गनं वइ ? आ: लालपुर्जा मदुपिन्सं सरकारी ग्वाहालि काये हे खनीमखुला ? थ्व न्ह्यस: ब्वलना: चंगु दु । मनूतय मनय आशाकां थाय कयाचंगु दु ।

मेगु च्वय सम्भौतापत्रय न्ह्यथनात:कथं मेथाय गनं छै मदु धायेमा: । थौकन्हय भी नेवा:तय छखा हे छैय कात्तुकाक दार्जुकिजा मांअबु च्वनेगु चलन मदय धुकल । बुँ मिया: जिलला थ:महं कमाय याना जिलला मेथाय छै दनां च्वनेगु चलन वल । दार्जुकिजा, मांअबु छखे जाथुया: नयेगु, छखे च्वनेगु या:सां थ:पिनि छैया खँ पिने मवनेमा: धका: मां अबु दतलय मालपोतय वना: अंशवण्डा याइमखु । थुगु कथं छखे च्वनाच्वपिं कार्यपिनि न्हूगु छै जुया भुखाचं मदु । पुलांगु छै च्वनाच्वपिं बुराबुरिपिनिगु छै दुन । आ: व छै दयेकेत सरकारयाके ग्वाहालि फोंवबलय कायपिं नाप छखे मजूनि कार्यपिनि छै दु धका: ग्वाहालि दइमखु धाल । आ: इमिसं व छै गथे याना: दिन ? बुँ मिइदुपिनि ला बुँ मिया दनि । छुं नं मदुपिनि छु याना दनि ?

निखा छैदुपिनि भुखाचं थुंगु छै दनेत सरकारं छुं हे ग्वाहालि याइमखुला ? छु निखा छैदुपिं नेपा:या नागरिक मखुला ? इमित सरकारं क्षतिपूर्ति बिइमा: ला कि म्वा: ? किपू नगरपालिका पाँगाया धुसि त्वालय सुचुक दुंगु छैत गबले दयेके फइ ? थ्व पाता: जूगु छै पाता: हे जुयाच्वनीगु जुल । छै दुंगु धयागु भी नेवा:तयगु हे ख: । थुकी स: तयेमा:ला कि म्वा: ? थ्व न्ह्यस: थन ब्वलंगु दु । थुकिया लिस: सुनां बिइगु ? थुगु कथं नेवा:तयत स्व:निगलं विस्थापित यायेगु थ्व छगू चाल ख: धा:सां छु पाइमखु ।

न्हूदँया
लसताय
भिंतुना

नेपा:या राष्ट्रिय संवत नेपाल संवत् ११३७
न्हूदँया लसताय सकल नेपा:मिपिन्त भिंतुना
देछयाच्वना ।



ज्वजलपा वा:पौ

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweekly@gmail.com



थुगुसी न्हूदं ने. स.११३७ नमखा: त्वालं



ज्वजलपा वा:पौ /

भिनछदं न्ह्य:निसं पांगायामिसा पुच:तसं दयदसं पा: कया: न्यायका वयाचंगु नेपाल सम्बत न्हूदं समारोह थुगुसी नमखा: त्वा:या विष्णुदेवी महिला समूह नं भिन्तुना च्याली याइगु जूगु दु ।

थ्वहे वइगु कछलाथ्व पारु कार्तिक ३५ गते सोमवा: कथं सगं बिया च्याली न्ह्याइ धका: ग्वसा खलकं धा:गु दु । पांगा देय न्यंक चाहिला वया:

नमखा:तय ध्यंका च्याली क्वचाई ।

थुगुसी च्याली ब्वतिकाइपिं खल:पुच:त मध्ये स्वखल:सित, त्वा:त्वालय दयेका:तइगु बांला:गु मण्ड: मध्ये छम्हेसित व बांला:गु ध्वाखायात सिरपा विइगु जूगु दु । नापं च्याली ब्वतिका:पिं खल:पुच:पिन्त मतिना चिं व प्रशंसा पत्र नं ल:ल्हाइगु जूगु दु ।

थ्वहे न्हूदं हनेत ग्वाहालि यानादीपिं सकसित कार्तिक १२ गते सुक्रवार सनिलय जुइगु

सांस्कृति कार्यक्रम हना: पौ ल:ल्हाइगु जूगु दु ।

ने.सं. ११३८ न्हूदं हनेत धुसिया लूनिभा: मिसा पुच:यात पाव्व ल:ल्हाइगु जूगु दु । पांगायामूलम्ह गणेश: दुगु त्वा: धुसि त्वा:या लूनिभा मिसा पुच:निसं मिसा पुच:तसं मंका: कथं न्यायेका वयाचंगु न्हूदं भिनिदं लिपा अन हे पा: ला:वंगु दु ।

धुसित्वालं सुरु या:वलय च्याली सुरु जुइन्त्य: ब्वति का: वइपिन्त धौ व ख्यें सगं बिया: छव:गु ख: । समयबजि नकेगु, प्रमाण पत्र विइगु छुं हे चलन मदुगु ई फुनां वलिसे, मंच दयेका भाषण याकेगु, समयबजि नकेगु व प्रमाण पत्र विइगु चलन बल । यक्व धेवा खर्च माला:वल । गुकिं याना: छुं छुं मिसा पुच:तसं असन्तोष प्वंकेगु नं याना हयाचंगु दु । उकिं ग्वसा खलकं थुकी बिचा: यायेमा:गु दु । मखुसा थ्व न्हूदं च्याली ताकाल तक न्ह्यानाचवनीगुली शंका यायेगु थाय दयाव:गु दु ।

जनसेवा शिक्षक कर्मचारी कल्याणकारी कोषया साधारण सभा क्वचाल

ज्वजलपा वा:पौ /

जनसेवा उच्च मा.वि. पांगामा कार्यरत शिक्षक कर्मचारीतसं लय पतिकं थ:गु तलबया निश्चित धेवा ल्हाना: जनसेवा शिक्षक कर्मचारी कल्याणकारी कोषया पलिस्था यानात:गु ख: । कार्तिक ६ गते सनिवा: सुथय जनसेवा स्कूलय भिनिक्व:गु साधारण सभा यात ।

कोषया नाय: सानुकुमारी भण्डारीया नायोसुइ जूगु उगु ज्याभव्य:या मूपाहाँ विद्यालय व्यवस्थापन समितिया नायो माधवलाल महर्जन त्वा:वालय मत च्याका: उले ज्या यानादिल ।

विशेष पाहाँकथं पुलांम्ह विद्यालय व्यवस्थापन समितिया नायो खगेन्द्र राई, शिक्षक प्रतिनिधि रामचन्द्र महर्जन, ई दुर्कमान महर्जनपिं भाया दीगु ख: ।

शिक्षक राजेन महर्जन न्ह्याका दिइगु ज्याभवलय न्वकू



अमिता डंगोल लसकुस न्वचू बियादीगु ख: ।

थुगुसी तिनि मदुम्ह शिक्षक रामशंकर महर्जनया लुमन्ति छगु मिनेट मौन धारण याना: बिचा: हायेकल ।

छयाञ्जे पवित्रा डंगोल वार्षिक प्रतिवेदन न्ह्यव्वया दिलसा दांभरिं रुपा महर्जन वार्षिक आर्थिक प्रतिवेदन व लेखा परीक्षण प्रतिवेदन न्ह्यव्वया दिल ।

उगु मुँज्याय वरिष्ठ शिक्षक कर्मचारी अभिनन्दन यायेगु भवलय २०३८ साल फागुण ८

गतेनिसं जनसेवाय ज्या याना वयाचंम्ह प्राचार्य नन्दकुमारी महर्जनयात अभिनन्दन या:गु ख: ।

अथे हे मूपाहाँ माधवलाल महर्जनयात नं मतिना चिं ल:ल्हा:गु ख: ।

शिक्षक प्रतिनिधि रामचन्द्र महर्जन, प्राचार्य नन्दकुमारी महर्जन व मूपाहाँ माधव लाल महर्जन भिन्तुना न्वचू बियादीगु ख: ।

वयां लिपा बन्द शत्र जुल । थुगुसी पदाधिकारीपिं नं ल्यइगु जूगु दु ।

इमाडोलय प्राकृतिक मिथेन ग्यासया उत्पादन सुरु जुल

ज्वजलपा वा:पौ /

यलया इमाडोलय प्राकृतिक मिथेन ग्यास उत्पादनया औपचारिक सुरुवात उद्योग मन्त्री नविन्द्रराज जोशीं यानादिल । उद्योग मन्त्रालय अन्तर्गतया खानी व भूगर्भ विभाग इमाडोलय ग्यास उत्खनन यायेत डिलिडया ज्या क्वचायेक धुंकूगु दु । भूगर्भ विभाग निदं न्ह्य:निसे डिलिड यानाचंगु ख: । थ्व हे ख्यात

वा:चायेका: थगुने नाकावन्दीया इलय तत्कालिन प्रधानमन्त्री के.पि. शर्मा ओलिं पाइपलाईन पाखें छेंय छेंय भुतुलिइ ग्यास थ्यंकाविइ धा:गु ख: । ओलीया थ्व भाषण लिपा थ्व डिलिड यायेगु ज्या न्ह्याका: क्वचायेकूगु ख: । ओलीं थथे धा:बलय ओलीया खिल्ली उदय या:गु ख: । इमाडोलनिसं स्वनिग:या १४ गू थासं ग्यास उत्पादन यायेफइगु निष्कर्ष पिकासं खानी विभागं

उत्खननया ज्या न्ह्य:ने यंकूगु ख: । इमाडोलया परीक्षण ता:लायेखतं मेमेगु थासय परीक्षण याना: उत्पादन न्ह्याकेगु विभागं जानकारी बिउगु दु । खानी विभागया प्राकृतिक ग्यास व कोइला शाखाया प्रमुख पृथ्वीलाल श्रेष्ठ आ: उत्खनन या:गु ग्यास भण्डारणया निति प्लान्त तयेत मेसिन जडान याना: ग्यास च्याम्बर दयेकेगु ज्या न्ह्याकाचवनागु धयादिल । विभागं

न्हापांगु चरणय परीक्षणया रुपं चीग्व:गु मोवाइल प्लान्त निर्माण यायेत्यनागु श्रेष्ठ धयादिल । उत्पादन जूगु ग्यास भण्डारण याना: सुरुइ ज:ख:या सरकारी ज्याकुथिइ छयलाबुला यायेगु योजना दु । व, बुलुहुं पाइपलाईनपाखें सर्वसाधारणया छेंय नं जडान यायेगु दावी सरकारी अधिकारीया दु । श्रेष्ठया कथं सम्भाव्यता जूगु थासय ३०० मिटरया त:जा:गु डिलिड

याना: जमिन त:लं ग्यास पिकाइगु जुइ । थथे पिहां व:गु ग्यासय छगू भाग कार्वन व प्यंगू भाग हाइड्रोजनया मात्रा दइ, गुकियात 'सिएसफोर' धाइ । थुज्व:गु ग्यासय ल:या मात्रा नं दइ । जमिन त:लं ग्यास पिकया: पाइपपाखें भण्डारस्थलय तया: बाय तप्यंक वितरण याये फइ । थ्व ग्यास रंगहीन व गन्धहीन जुइ । थ्व ग्यास गथे पिहां वइ

अथेहे वितरण याइगु जुइ । जमिन त:लं ग्यास पिकायेगु धैगु खं न्हूगु धा:सा मखु । २७ दै न्ह्य: हे जापान सर कारया अन्तर्राष्ट्रिय सहयोग नियो ग (जाइका) या:गु । अध्ययनय स्वनिग:या इमाडोल, तीनकुने, कोटेश्वर व त्रिपुरेश्वरलिसंया थ्यंमथ्यं २६ वर्गकिलोमिटर क्षेत्रय ३१ करोड घनमिटर ग्यास भण्डार दूगु न्ह्यथनात:गु ख: ।

**पिदंगु दु
स्वंगू सफू**

उपन्यास

थ्वया च्वंगु स:

न्वचू, उद्घोषण व एफ एम

संचालन कला नास:

चिनाखं मुना ईब्य:या चिनाखं



नजरराम महर्जनया भिंछगूगु उपन्यास 'थ्वयाच्वंगु स:'

मू
निस: तका जक



श्रीकृष्ण महर्जनया न्यागूगु सफू 'नास:'

मू
न्यय तका जक



नाति महर्जनया न्हापांगु सफू 'ईब्य:या चिनाखं'

मू
सच्छि तका जक

**थ:गु प्रति
सुरक्षित
यानादिसं
न्हि
स्वापू**

४३३३००७,
९८४१४०१०७७



म्हपुजा, किजापुजा, लक्ष्मी पुजा छु ख: ?

श्रीकृष्ण महर्जन

तःसिया महत्व: छु ख: ?

म्ह पुजा व किजा पुजाय मेमेगु फलफुल मदुसां जिउ तर तःसि धा:सा दये हे मा: । नेवा:तयसं तःसियात तसकं महत्व विया वयाचंगु दु । तःसि धइगु सि अर्थात फलफुलत मध्ये नं दक्ले महत्वपूर्णगु व मू सिया रुपय हे तःसियात कयातःगु दु । गुलि नं सि अर्थात भि दुगु सि चाकुसि, सुन्तलासी, खाइसि, भ्रमसि, भोगते लगायत सीत दु व फुकक तःसिपाखें हे पिहां वःगु धाइ । उकिं मेमेगु सि मदुसां तःसि जक दयेवं हे गा: । अले म्ह पुजा व किजा पुजाया भवलय् थीथी सि अर्थात फलफुल ल:मल्हासे तःसि ल:ल्हायेगु याना वयाचंगु ख: । उकिं तःसिया महतव अप्पयाचंगु ख: ।

म्ह पुजा व किजा पुजाय खें सगं छाय विइ ?

खें सगं बिइगु धइगु पञ्चतत्व ल:ल्हाना हइगु ख: । सगं बिइगु इलय् न्या, ला, व, खें व अय्ला तथा बिइगु ख: । न्या धइगु जल तत्व, ला धइगु पृथ्वी तत्व, व: धइगु वायु तत्व अले खें धइगु आकास तत्व ख:सा अले अय्ला वा थ्व धइगु तेज तत्व ख: । थ्व न्यागुलिं तत्व सन्तुलित जुल धा:सा जक मनूत स्वास्थ्य जुइगु अले न्ह्यागु ज्या याना नं जीवन न्ह्याके फइ धका: तयेकीगु नेवा: संस्कृति या दर्शन ख: । पञ्चतत्वात्मक जीवनय छगू जक तत्व मन्त म्हो जुल धा:सां वायु असन्तुलित जुल धा:सा अस्वस्थ जुइ । उकिं थ्व न्यागुलिं तत्वयात सन्तुलित याना तयेगु नितिं हे खें सगं काइगु तान्त्रिक दर्शन ख: । थ्व नेवा:तयगु मौलिक कथंया दर्शन दुध्यानाचंगु संस्कृति ख: ।

म्हपुजा व किजा पुजाया इलय् स्वक्व: तक फं छाय लुइगु ख: ?

म्ह पुजा व किजा पुजाया भवलय् नेवा:तयसं स्वक्व: तक फं लुइगु इलय् फं अर्थात पाथिइ स्वां, जाकि, सिन्ह:, बरां, चिचीग:गु योमरीनिसं ख:सिं तथा अले चिचिधंगु मेमेगु फलफल नं तथा लुइगु याइ । स्वक्व: स्वक्व: फं लुना हइगु धइगु शरिर अर्थात म्हग, नुग: अर्थात आत्मा व बुद्धिया नितिं ख: धका: धाइ । म्ह पुजा म्ह पुजा धइगु शरिर जक मखु नुग: व बुद्धिया नितिं नं ख: । उकिं स्वक्व: तक अथे फं लुइगु नेवा:तयगु उ थःगु हे कथंया विस्कं संस्कृति ख: ।

स्वन्ति नख:या भवलय् जाकि चूया मनुचा व त्वा:देवा:या महत्व छु ख: ?

स्वन्ति नख: धइगु थःगु अन्न वा दुकाये धुंका: हनीगु नख: ख: । लक्ष्मी पुजा खुन्हु अन्न वा व



जाकियात पुजा याइगु ख: । अले व हे न्हूगु वा वा जाकि जुया उकिं हे दयेकीगु छगू कथंया नसा ज्वलं धइगु मनुचा अर्थात द्य:चा मरि व त्वा:देवा मरि ख: । मनुचा जीवन न्ह्याबलें ल्यना च्वनीमखु छन्हु फुना वनी धइगु सांकेतिक रुपं सन्देश बिइत मनुचा मरि अर्थात द्य:चा मरि नापं मत त्याकेगु त्वा:देवा: दयेका दयेका लक्ष्मी पुजा, म्ह पुजा व किजा पुजा याइगु ख: । अन्न व बुज्या नाप स्वापू दुगु स्वन्ति नखतय जाकि चूया थुगु कथंया मरिया महत्व दयाचंगु दु । थ्व धइगु नेवा:तयगु थःगु हे पह: ख: । मेमेपिलिसे ज्व: मला:गु चलन ख: ।

किजा पुजाय ग्वयस्वांमा:या महत्व

किजा पुजा याइगु इलय् नेवा: समाजय ग्वय स्वांमा: मदयेकं हे मगा: । स्वयेबलय् ग्वय थें च्वंगु स्वांया मा: जूगुलिं हे ग्वयस्वांमा: धा:गु ख: । सुकू गाना मवनीगु जुया ग्वयस्वांमा:यात दीर्घायु व स्वस्थ जीवनया प्रतिक कथं नाला थ: दाजु व किजापिन्त अथे ग्वय स्वांमा: क्वखायेकीगु ख: किजा पुजा खुन्हु । थिइवले च्वच्चां सुइगु थुगु स्वांया रंग धइगु तुयुगु, गाढा कलेजो व हल्का ह्याउगु विशेष प्रकारया स्वां ख: । थुगु स्वां नेवा:तयसं विशेष याना किजा पुजाया दिनय छयलयेगु याना वयाचंगु दु ।

म्ह पुजा गुगु कथं याइ ?

तिथिया त्याखं दैय दसं कछलाथ्व पारुया दिनय हे म्ह पुजा याइगु नेवा:तयगु मौलिक कथंया संस्कृति ख: । म्ह पुजा धइगु मौलिक कथंया नेवा:तयगु मंका:गु संस्कृति ख: । म्ह पुजा थःथःगु कथं हनेगु याना वयाचंगु दुसां मूल रुपं पुजा विधि व पुजाया सिद्धान्त धइगु छगू हे कथंया खने दु । म्ह पुजा याइगु विधियात कया चीहाकलं न्हयव्वयाच्वना । न्हापां म्हपुजा यायेगु थासय बै पुना ह्याउक बै थिला: नील: हा:यान सुद्ध यायेगु याइ । अनं लिपा हाकन बै पुना हइ । ह्याउक बै थिला: ह:गु थासय म्ह पुजा याइगु थासय च्वय व क्वय छगू छगू द्य:या नितिं धका: तथा गुलि म्ह पुजा याइपिं दु इपिं सकलसित याना गुलि मा: उलि हे मन्द: च्वयेगु याइ । मन्द: धइगु



ब्रम्हाण्डया प्रतिक ख: धाइ । ह्याउक बै थिलातःगु थासय जाकि चुं नं तुइक अष्टमण्ड: च्वयेगु याइ । गुलि म्ह पुजा याइपिसिबें च्वय छगू व क्वय छगू याना निगु अप्प: मन्द: च्वये धुनेवं उगु मन्दलय रंगिन यायेत जाकि

चूया द्य:ने ह्याउगु रंग तथा हइ । अनं लिपा मनुचा शरिर न्ह्याबलें ल्यनीमखु धइगु प्रतिक कथं वा सियातःगु ताय मन्दलय चाक:हिइकं तथा हइ । अनं लिपा विश्व ब्रम्हाण्डय थीथी कथंया गथे ग्रहत दु अथे हे ग्रहतयगु प्रतिक कथं हाकु मुस्या, हाकूगु ग्व:माय नं मन्दलय ब्वया हइ । मन्द:या दथुइ लाक्क जीवन नसुरया प्रतिक कथं आखे पुच: पुच: तथा हइ । आखे धइगु वायात क्यला खोला लिक्का तःगु ख: । अथे आखेया दथुइ गा: वंका: खाली याना इता: पवया चिकं मन्द: दयेका हइ । काचाक्क मगनीगु कथं अले ता: ई तक ल्यनीगु अर्थय अथे चिकं मन्द: च्वइगु ख: । चिकं मन्द: जीवन चिरन्जीवीया प्रतिक नं धाइ । मन्दलय दक्ले न्हापां तःसि तइ । तःसि धइगु नेवा: मखुपिन्सं विमिरो धाइ । स्वन्तिया इलय सइगु सी अर्थात फलफुलत मध्ये मू सी अर्थात फलफुलया रुपय तःसियात नालातःगु दु । सुन्तलासी, चाकुसी नापं भि दुगु गुलि नं सि दु व फुकक मध्ये नं महत्वपूर्णगु तःसि ख:सा व हे तःसिपाखें मेमेगु सि पिहां वःगु जुया म्हपुजाया इलय तःसि मदयेकं मगा: धाइ । अथे तःसि तये धुंका: सुन्तलासि, चाकुसि, भ्रम्सी, नापं थीथी सि अले केरा, हलवावेच, मौसम, नैक्या, भोगते नापं सकतां फलफल मन्दय ब्वया हइ । अथे फलफुल मन्दय ब्वया हथे धुनेवं काचाक्क मन्सीगु ख्व:सिनिसें अम्ब:, सिंगाली, बेली नापं मौसम कथंया फलफल व स्वां तक तइ । अथे हे म्ह पुजाया मन्द: न्हय:ने जाकि चूया द्य:चा दयेकातःगु छम्ह छम्ह व त्वा:देवा छग: छग: तयेगु याइ । अथे हे मन्दलय न्याता काप: तयातःगु तुयुगु क्वखा नं तइ । अथे सकतां तये धुनेवं मन्द:या दक्ले च्वय तयातःगु सुकुन्दायात च्याकी । सुकुन्दा च्यकीगु धइगु मत द्य: च्याकीगु अर्थात मतद्य:यात साक्षि तइगु ख: । सुकुन्दा च्याके न्हय: हे थःथःगु मन्दय सकलें भव:लकं फये तुना हइ । अले सुकुन्दायात पुजा याना हइ । अथे सुकुन्दायात पुजा याये धुनेवं मन्दलय नं पुजा याना हइ । सुकुन्दायात पुजा याइगु धइगु मत द्य:यात पुजा याइगु ख: । अथे पुजा याइगु धइगु निर्जिवयात सजिव यायेगु कथं पञ्चतत्वं पुजा याना जीवीत जूगु तायेकी । पृथ्वी, जल, वायु तेज व आकाश याना पञ्चतत्वं दयाचंगु मनुचा शरिरया दयाचंगु धका: तायेका वयाचपिं नेवा:तयसं पञ्चतत्वं हे पुजा याइगु ख: । पृथ्वी तत्वया प्रतिक कथं जाकि पुजा याइ, जल तत्वया प्रतिक कथं लखं हा: याइ, तेज तत्वया प्रतिक कथं सिन्ह: तिक्की, वायु तत्वया प्रतिक कथं जजंका क्वखायेकेगु व आकाश

तत्वया प्रतिक कथं स्वां तथा पुजा यायेगु याइ । म्हा पुजा याइम्हेंसिया मन्द:निसं देशं पिने पिहां वनाच्वंम्ह छेंज: दुसां वयागु नामय तःगु मन्दलय तक पुजा याना



हइ । अथे फुकक मन्दलय पुजा याये धुनेवं मन्द:या न्हय:ने च्वनाच्वंम्ह मनुयात नं अथे हे पञ्चतत्वं पुजा याना हइ । मनुयात नं पुजा याये धुंका: फ अर्थात पाथिं सुकुन्दानिसं द्य:या भागया मन्दय नापं अनं लिपा मनुतयगु मन्दलय अले मनुयात भव:लकं स्वक्व: स्वक्व: लुना हइ । फं लुना हइगु इलय फं अर्थात पाथिइ स्वां, जाकि, सिन्ह:, बरां, चिचीग:गु योमरीनिसं ख्व:सिं तथा अले चिचिधंगु मेमेगु फलफल नं तथा लुइगु याइ । स्वक्व: स्वक्व: फं लुना हइगु धइगु शरिर अर्थात म्हग, नुग: अर्थात आत्मा व बुद्धिया नितिं ख: धका: धाइ । म्ह पुजा यानाह:म्हेंसियां नं थम्ह थ:त हे फं लुइगु याइ मेपिन्त थें हे । अनं लिपा न्याता काप: तयातःगु क्वखा व तःसि ल:ल्हाना हइ । थःथःगु मन्दय च्वंगु तःसियात पुजा याना ल:ल्हाना कया भागि तक याइ । अथे पुजा याना तःसि ल:ल्हाना काये धुनेवं थःथःगु मन्द:या क्वखा क्वखायेगु याइ । म्ह पुजा याइम्ह मनुचा मन्दलय च्वंगु तःसि नं थःथःम्ह हे पुजा याना ल:ल्हाना काइ । अले देशं पिने पिहां वनाच्वंम्ह जूसा मन्दय पुजा याना संका बिइगु धका: ध्वाना बिइगु तक याइ । तःसि ल:ल्हाये धुंका: धौ सगं विइ । मिर्जपिन्त जूसा जवय मिर्जपिन्त जूसा खवय न्हकुइ धौ तिका हयेगु याइ । धौ सगं धइगु शुभ साइतया संकेत ख: धाइ । उकियात हे धौ सगं बिइगु धाइ । धौसगं विइ धुंका: खें सगं सकलसित विया हइ । खें सगं बिइगु धइगु पञ्चतत्व ल:ल्हाना हइगु ख: । सगं बिइगु इलय न्या, ला, व, खें व अय्ला तथा बिइगु ख: । न्या धइगु जल तत्व, ला धइगु पृथ्वी तत्व, व: धइगु वायु तत्व अले खें धइगु आकास तत्व ख:सा अले अय्ला वा थ्व धइगु तेज तत्व ख: । थ्व न्यागुलिं तत्व सन्तुलित जुल धा:सा जक मनूत स्वास्थ्य जुइगु अले न्ह्यागु ज्या याना नं जीवन न्ह्याके फइ धका: तयेकीगु नेवा: संस्कृति या दर्शन ख:



। पञ्चतत्वात्मक जीवनय छगू जक तत्व मन्त म्हो जुल धा:सां वायु असन्तुलित जुल धा:सा अस्वस्थ जुइ । उकिं थ्व न्यागुलिं तत्वयात सन्तुलित

याना तयेगु नितिं हे खें सगं काइगु तान्त्रिक दर्शन ख: । अले खें सगं काइगु इलय स्वक्व: खें वांन्याइ नापं स्वक्व: हे अय्ला तथा त्वनेगु याइ । उगु कथं स्वक्व: वां न्याइगु नापं स्वक्व: अय्ला तथा त्वनीगु धइगु शरिर अर्थात म्हग, नुग: अर्थात आत्मा व बुद्धिया नितिं ख: धका: धाइ । थ्व स्वंगु हे पक्षया नितिं अथे सगं कयागुया अर्थय हे स्वक्व: वां न्यायेगु नापं स्वक्व: अय्ला कया त्वनेगु याइ । म्ह पुजा या:म्हेंसियां थ:म्ह थ:त हे खें सगं तक काइ । विदेशय वनाच्वंम्ह छेंज:या नामय तःगु मन्दलय उम्ह मनुचा नामय खें सगं तथा बिइगु याइ । उगु कथं खें सगं कया खें नये धुंका: जक थ:थःगु मन्दय च्वंगु इता च्याकेगु याइ । अले म्ह पुजा छगू कथं क्वचा:गु तायेकी । अनं लिपा ज्वरे यानातःगु भवय नयेगु तक याइ । नेवा:तयसं याइगु म्ह पुजा धइगु दच्छि यंकंया जीवन सफल जूगुलिं आ: न्हूगु दैया नितिं नं पञ्चतत्व शरिरयात न्ह्याबलें सन्तुलित याना जीवनय वइगु पंग:यात चीका न्हय: वने फयेमा: धका: संघर्षया याना वनेत तिव: बिइगु कथंया पुजा ख: । उकिया अर्थ संघर्षवादी सिद्धान्त ज्वना म्ह पुजा याना वयाचंगु ख: । म्ह पुजा धइगु नेवा:तयगु मौलिक कथंया संस्कृति ख: । गुगु संस्कृति धइगु संघर्षवादी सिद्धान्त ज्वनाचंगु नाप नापं मनुयात हे द्य: भा:पिया याइगु विशेष कथंया पुजा ख: । विश्वय गनं नं गुगु समाजय नं मदुगु मनुचा म्हगयात हे पुजा यायेगु चलन धइगु नेवा:तयगु छगू म्हसीका जुयाचंगु दु ।

स्वां क्वकाइगु

नेवा: मखुपिनिसिबें ब्यागलं कथं नेवा:तयसं स्वन्ति नख:या रुपय हना वयाचंगु चलन धइगु स्वां क्वकायेगु ख: । लक्ष्मी पुजा या:गु प्यन्हु दुखुन्हु स्वां क्वकायेगु ज्या याइ । लक्ष्मी द्य:या स्वां अर्थात अन्नयात पुजा यानातःगु प्रसाद क्वकायेगुयात स्वां क्वकायेगु धाइ । किजा पुजाया कन्हय खुन्हु अथे स्वां क्वकाया सकलसित स्वां बिइगु नाप नापं प्रसाद तक बिइगु याइ । अथे स्वां क्वकाये धुंका: जक स्वन्ति नख: क्वचा:गु तायेकी ।

अन्धविश्वासय् लिकुनाच्चंगु विज्ञान



पन्नारत्न महर्जन

नेवा: समाजय् थीथी कथं संस्कृतित दु अले थ:थ:गु कथंया धारणा दयेका वयाच्चंगु खने दु । संस्कृतिइ विविधता दुपिं नेवा: समाज दुने थथे याये मत्य: अथे याये मत्य धका: थीथी कथंया अन्धविश्वास ल्यनाच्चंगु दु । अज्व:गु कथंया अन्धविश्वास दुने वास्तवय् विज्ञान सुलाच्चंगु दु धका: पन्नारत्न महर्जनं क्यनादीगु दु । वय्कलं नेवा: समाज नाप स्वाका अन्धविश्वासरय् लिकुनाच्चंगु विज्ञान नांगु सफू तकं च्वयादीगु ख: । व हे सफूपाखें निरन्तर रुपं न्हयव्वया वयाच्चनागु ख: - सं.



३१. भव्य/जा नये न्ह्य: ल्हा: सिलेमा:

ल्वचं मकयेक म्बाना च्वनेया लागि नसायागु यक्व भूमिका दइ । जिउयात मनीगु नसां उसाय् भिंकी मखु । नीगु नसा नं सफा सुघर मजुलकि ल्वय् जुइ य: ।

नसा नयेबलय् ल्हातिं कया नयेगु याइ । न्हापा न्हापा आ:थें चम्चां आदि नयेगु चलन मदु । ज्या यायेबलय् नं नांगा ल्हातिं हे याइ । थौकन्हय् थें पञ्जा न्ह्याना यायेगु चलन उबलय् मदु । ज्या यायेबलय् ज्या अनुसार न्ह्यागु ल्हातिं थी मालाच्चनी । ज्या यायेगु थाय् दक्वं यचुपिचु जुइ धयागु ग्यारेन्टी दयाच्चनी मखु । अज्या उसाययात मनीपिं कीत नं दयाच्चनेफु । दक्वं कीत खके फयाच्चनी मखु । मिखां हे न्ह्याये मदुपिं सुक्ष्म किटाणुत नं दइ । थज्या:पिं किटाणुत ल्हाती प्यपुनाच्चंगु खंकेफइमखु । ल्हा: मसिसे छुं नं नसा

नयेबलय् नसाया लिसें थज्या:पिं कीत नं प्वाथय् वनीगु यक्व सम्भावना दइ ।

भीत मनीपिं सुक्ष्म किटाणुतसैं थीथी ल्वय् जुइके य: धयागु स्वास्थ्य विज्ञानं प्रमाणित याना: क्यनेधुंकूगु दु । प्वाथय् किमि दाइगुनिसें तत:धंगु सक्रामक ल्वय्तकं फोहरय् दाइपिं किटाणुतय् पाखें जुइ धयागु तथ्व सावित जुइधुंकूगु दु ।

ज्या सनेबलय् थज्या:पिं कीत ल्हाती प्यपुनाच्चने य:गुलिं नसा नयेन्ह्य: बांलाक ल्हा: सिला जक नयेगु यायेमा: । थज्या:गु खँ भी पुर्खापिसं न्हापा न्हापा हे सीका तये धुंकूगु ख: । उकिं हे थज्या:गु सम्भावित खतरा वचय् जुइकेत छुं नं नये न्ह्य: ल्हा: सिला: नयेमा: धयात:गु ख: ।

ताउतक छुं नं मनसे च्वनेबलय् म्हुतु फ्वफ्व: धया: च्वनेय: । कथु नं गनांच्चने य: । थज्या:गु अवस्थाय् नसा नयेबलय् गबलें गबलें त्वंपुइ य: ।

त्वंपुइगु धयागु बांलागु लक्षण मखु । म्हुतुइ अथे जुयाच्चनीबलय् ल: भचा तयाबिल धायेवं म्हुतु चकना वइ, कथु चाली । उकिं नसा नये न्ह्य: नसाल काये थें याना: म्हुतु प्याकेत ल्हाती ल: कायेगु याइ । ल: कायेबलय् ल्हा: नं प्याका: छक: सिला छवयेगु याइ ।

मेमेगु नयेबलय् सिकं जा नयेबलय् ल्हा: मप्यातकि ल्हाती जा प्यपुना: पेय काये मछिनेय: । ल्हा: प्यात धायेवं जा प्यपुनी मखु । अथे जुया: नं जा नये न्ह्य: ल्हा: प्याके ज्वलं ल: कया: ल्हानापं सिलीगु ख: ।

चव्य न्ह्यथनागु तथ्ययात ध्यानय् तया: भी पुर्खापिसं नसा नये न्ह्य: ल्हा: सिलेमा: धयात:गु ख: थुकीया निरन्तर ता आ:तक नं भव्यबलय् नये न्ह्य: ल्हा: सिकेगु चलन यानाच्चंगु दनि । तर ल्हा: सिलेगुया नामय् बांलाक ल्हा: मसिसे ल: भ्या: कया: नसला थें जक कायेगु धा:सा मखु ।

सोमवा: नेपालभाषा एकेडेमिपाखें दान्यहिरा सिरपा: ल:ल्हाइगु

नेपालभाषा एकेडेमिपाखें सोमवा: दान्यहिरा सिरपा: ल:ल्हाइगु जूगु दु । दँय् दसं एकेडेमिपाखें उगु सिरपा: ल:ल्हाना वयाच्चंगु ख: । थुगुसी नेपालभाषाया नांदंम्ह बाखं च्वमि नापं उपन्यासकार मथुरा साय्मियात दान्यहिरा सिरपा: ल:ल्हायेत्यंगु दु । अथे हे दान्यहिरा ह:पा: सिरपा: कवि नापं बाखं च्वमि नारद वज्रचार्ययात ल:ल्हाइगु जूगु दु । अथे हे तँसा कथं दान्यहिरा विज्ञान प्रविधि सिरपा: डा. रमेशमान सिंयात ल:ल्हायेत्यंगु दु । यलया अशोक पार्टी प्यालेसय् सोमवा: छगू ज्याभ्व:या दथुइ उगु सिरपा: ल:ल्हायेगु ज्याभ्व: तयात:गु दु ।

दान्यहिरा सिरपा: न्यय्दु: तका दां नापं हनापौ ख:सा अथे हे दान्यहिरा ह:पा: सिरपा: नीन्याद्र: तका दां नापं हनापौ अले दान्यहिरा विज्ञान प्रविधि सिरपा: नीन्याद्र: तका नापं हनापौ ल:ल्हायेगु जुइ धका: नेपालभाषा एकेडेमिं धा:गु दु । नेपालभाषाया साहित्य व संगीत विद्यायात अत:गाका पालंपा: दँय् दसं ल:ल्हाना वयाच्चंगु थुगु सिरपा: थुगुसी भिंस्वक्व:गु ख: । थुगुसीनिसें दान्यहिरा विज्ञान प्रविधि सिरपा: नं बिइगु ज्या जूवनाच्चंगु दु ।

उगु सिरपा:या दाता नेपालभाषा एकेडेमिया भाइस चान्सलर यज्ञरत्न धाखा:या बाखं सफू तुतां नं पितव्वज्या यायेगु ज्याभ्व: तयात:गु दु ।

लच्छियंकया च्वबाहा: मेला

स्वनिग:या दक्ले च्वय्चंगु बहा: किपू नगर दुने लानाच्चंगु च्वबाहा: ख: । च्वबाहा: छ:याथाय् दँय् दसं थें थुगुसी नं वंगु काति पुन्हिनिसें मेला सुरु जूगु दु । लच्छि तक जुइगु उगु मेलाय् किपू नगर दुनेया नेवा:त जक मखु यें व यलया नेवा:त नं सुथ न्हापां वनीगु चलन दु । च्वबाहा: छ:यात स्थानीय नेवा:तय्सं हयाउँछ्वा: आजु धायेगु याना वयाच्चंगु दुसा अथे हे आनन्दधारी लोकेश्वर नं धायेगु याना वयाच्चंगु दु । विशेष याना थीथी ल्वचं मुक्त जुइगु नितिं च्वबहा: छ:याथय् मेलाय् वनेगु धइगु न्हापानिसें धायेगु याना वयाच्चंगु दु ।

च्वबहा: छ:याथाय् किपू पांगा, नगांयापिं अप्ठ: याना न्हापा न्हापा जूसा इताग्व: जुया दक्षिणपाखेया लँपु जुया थाहां वनीगु ख:सा आ: वया उत्तरपाखेया लँपु जुया त्वाथ: गया वनीपिं भन भन अप्ठया व:गु दु । दक्षिणपाखेया लँ छगू कथं सुनसान जुयाव:गु दु ।

च्वबाहा: छ:याथाय् मेलाया हे भ्वलय् माय् अपसं च्वनीगु तकं चलन दु । उगु अपसं धइगु तसकं कथिन अपसंया रुपय् नालात:गु दुसा नेवा: समाजय् पार पाचुकेयात समाजिक रुपं मान्यता बिइगु अपसंया रुपय् नं नालात:गु दु ।

बिचा: हायेका

जन्म: वि.सं१९७७/०१/०१



मदुगु २०७३/०६/२६



मदुम्ह दस बहादुर महर्जन

ज्वजलपा वा:पौ व कीर्तिपुर सन्देशया भिचितामि व ग्वाहालिमि सुनिल महर्जनया बाज्या दस बहादुर महर्जन वंगु असोज २६ गते ९६ दँय् मदुगुलिं मदुम्हेसिया सुखावती भुवनय् वास लायेमा धका: कामना यासैं दु:खंक:पिं सकल छँज:पिन्सं मन चिइफयेमा धका: बिचा: हायेका च्वना ।


ज्वजलपा वा:पौ

न्हूबजा:, किपू -३

छिगू नं चिनाखँ, बाखंनिसें छुं नं कथंया च्वसू दुसा बियादिसँ जिमिसं ल्व:कंह्वा:गु ज्वजलपा वा:पतिइ पिकायेगु जुइ ।

ज्याकू: निखासी त्वा: किपू नपा-३
फोन ल्या: ४३३३००७, ९८४१४०१०७७
ई-मेल :
kirtipur_sandesh@live.com

निर्वाण कामना




बूगु दिं :
वि.सं.
१९७७/
०१/०१



मदुम्ह दस बहादुर महर्जन

मदुगु दिं :
वि. सं.
२०७३/
०६/२६



जिमि सुथंनिसें लुमंकेबहःम्ह जिमि ससःअबु/बाज्या दस
बहादुर महर्जन वंगु असोज २६ गते ९६ दँय् मदुगुलिं
मदुम्हेसिया चित्त शान्ति जुया सुखावती भुवनय् बास
लाय्मा धकाः कामना यानाच्चना ।

भौ- लक्ष्मी माया महर्जन

छय् - सुनिल महर्जन

छय् भौ - सविता महर्जन

छुई - सुसन महर्जन

छुई - सुनैना महर्जन

छय् - निक्सन महर्जन


छय् भौ - रिना महर्जन

छुई - जेनन महर्जन

छुई - जस्तीना महर्जन

छुई - जेसिना महर्जन

निर्वाण कामना




बूगु दिं :
वि.सं.
१९७७/
०१/०१



मदुम्ह दस बहादुर महर्जन

मदुगु दिं :
वि. सं.
२०७३/
०६/२६



सुथंनिसैं लुमंकेबहःम्ह जिमि अबु/बाज्या दस बहादुर
महर्जन वंगु असोज २६ गते ९६ दँय् मदुगुलिं
मदुम्हेसिया चित्त शान्ति जुया सुखावती भुवनय् बास
लाय्मा धका: कामना यानाच्चना ।

काय/भौ- धर्म महर्जन/ हिरादेवी महर्जन

छय् – निरज महर्जन
छय् भौ – विष्णु महर्जन
छुई – रेहान महर्जन
छुई – रिनेश महर्जन
छय् – निर महर्जन
छय् भौ – राजिना महर्जन
छुई – फेयना महर्जन

मृत्याय्- मय्जु महर्जन
जिलाजं- कृष्ण महर्जन
छय्- विजय महर्जन
छय् भौ –गंगा महर्जन
छय् – विनु महर्जन
छय् जिलाजं – हरिदास महर्जन

साहित्य/चिनाखँ

नेपाल संवत न्हू दँ



नाति महर्जन

छ:चपा पाँगा

दँय् दँय् कौलाख पारु खुनु वइगु
थुगुसी नं म्हपुजा नापं ब्वनावल न्हू दँ भीगु
भी सकसिनं नुग: खापा चोयका
यायेवा लसकुस न्हूदँ १९३७ यागु ॥

भी सकलें मिलय जुया चोने वा
न्हूदँया भिन्तुना कालविल याये वा
मने दुनेया अहंकार हाकु तिना
नेपाल संवत ३९३७ न्हूदँ लसताँ हने वा ॥

नेपा:या गौरव ख: नेपाल संवत धा:गु
न छंगु, न जिगु वला सकसियांगु
व ला राष्ट्रिय संवत ख:
विश्वं भीत मान्यता बिया त:गु ॥

दँय् दँय् नेपाल संवत हनाच्वने दयमा
नेपा:मि सकसिकें सदबुद्धि वयेमा
याकनं भीसँ देसय् नेपाल संवत छेला
शंखधरजुया कृति म्वाकातय फयेमा ॥

धन्य शंखधरजु थ्व गुण छिगु
न्त्याबलें नेपा:मिया मनय् दयाच्वनीगु
गरीवतयत त्यासा पुला नेपाल संवत निस्वन
नेपा:मितयगु न्हाय् ध:स्वाका वंगु ॥

भीगु संस्कृति भाय लिपि
आला राष्ट्रसंघय् दुथ्याका त:गु
नेपाल संवतयात राष्ट्रिय संवत धका
राष्ट्र संघं मान्यता बियात:गु ॥

राष्ट्रिय संवत याकनं छेले फयमा
न्त्याबलें न्त्याथाय् नं नेपा:
तिथिमिति च्वये दयेमा
भी मचातयत न्त्यागु स्कुल कलेजय् नं
नेवा: भाय् च्वये ब्वने दयेमा ॥

सकल नेपा:मिया जय जुइमा
रोग कष्ट भयनं थिइ मफयेमा
शान्ति, प्रगतिया लँय पला न्त्याका:

थ्व अनित्य संसार



कवि : राम महर्जन
की. न.पा. (१६, नगाउं

मनु जक जुयाँ मज्यू
गुलिं सज्जनपिं दु
गुलिं दुर्जनपिं दु
थ्व विचित्र संसारय दुने ॥

मनु जुया जन्म जुसां
मनु जुइत मा:गु गुण
छता हे मनुपिं नं दु
थज्यापिंत धाई कु मनु ॥

गुलिं पर उपकार याइपिं
गुलिं स्वार्थ जक स्वइपिं
गुलिं परोपकार याना थगु स्वार्थ स्वइपिं
निपा ल्हातय नं लय मापिं ॥

गुलिं नरम स्वभावपिं
गुलिं गरम स्वभावपिं
गुलिं घमण्डी स्वभावपिं
गुलिं सरल स्वभावपिं ॥

गुलिं उदारवादीपिं
गुलिं अनुदारवादीपिं
गुलिं धार्मिक भावना लीन जुया च्वपिं दु
गुलिं पाप धर्म मतलव मनुपिं दु ॥

मनुतय ख्वापा फरक थें
विचार, बुद्धि, ज्ञान व अले
भावना, भाषा, धर्म व कर्म
फुक्कै फरक फरक जुया च्वंगु दु ॥

निर्वाण कामना



जन्म: ने. सं.
१९७७/०९/०९



निधन:
२०७३/०६/२६



मदुम्ह दसवहादुर महर्जन

जिमि सुथनिसें लुमंकेबह:म्ह बाज्या दसवहादुर महर्जन वंगु असोज २६ गते ९६ दँय् मदुगुलिं
मदुम्हेसिया चित्त शान्ति जुया सुखावती भुवनय् बास लाय्मा

धका: कामना यानाच्वना ।

सुनिल महर्जन— न्यु एस.एन. ब्रदर्श हार्डवेयर सेन्टर

चीखु हनुमानघाट , कीर्तिपुर

निक्सन महर्जन— न्यु जे. एन इन्टरप्राइजेज

पांगा दोवाटो, नयाँबजार, कीर्तिपुर